

«Լսելով կառավարութեան հաղորդագրութիւնը և հաւանութիւն տալով նրա վարած քաղաքականութեանը՝ խորհրդարանը հրահանգում է լարել բոլոր ուժերը՝ ապահովելու համար երկրի պաշտպանութեան գործը: Միաժամանակ յանձնարարում է խորհրդարանի նախագահութեանը՝ կոչ անել ժողովրդին»:

Բանաձևն ընդունում է երեք ձայնի ձեռնպահութեամբ:

ՆՈՅԵՄԲԵՐ 23-Ի ԱՐՏԱԿԱՐԳ ԵՒՍՏՂ

Նիստը բացում է երեկոյեան ժամը 8-ին: Ներկայ են 35 պատգամաւորներ:

Նախագահում է Յովհ. Քաչազնունին:

Օրակարգը՝ կառավարութեան հրատարականը և դրա հետ կապւած խնդիրներ:

Նախագահ. — Հայաստանի խորհրդարանի պատգամաւորներ, նախագահութիւնը նախարարապետ Հ. Օհանջանեանից ստացել է ներկայ կառավարութեան հրատարականը, որ հետևեալն է.

«23 նոյեմբ. 1920թ. երևան

Հայաստանի խորհրդարանի նախագահութեան

Մեծարգոյ պարոն նախագահ,

Այսու պատիւ ունեմ խնդրելու ձեզ ներկայացնել Հայաստանի Հանրապետութեան պարլամենտին իմ և իմ նախագահութեան տակ եղած Հայաստանի հանրապետութեան կառավարութեան հրատարականը:

Նախարարապետ՝ Հ. Օհանջանեան»

Նախագահ. — Ցանկանում է արդեօք նախարարապետը բերանացի կերպով, որևէ բան աւելացնել:

Նախարարապետ Հ. Օհանջանեան. — Հայաստանի խորհրդարանի յարգելի պատգամաւորներ, խորհրդարանի վերջին նիստից յետոյ անցել է 10-12 օր: Այդ ժամանակամիջոցում մեր կեանքում այնպիսի մեծ փոփոխութիւններ են առաջ եկել, որ կառավարութիւնը նորից դիմում է խորհրդարանին: Յաղթող թշնամին մեզ առաջարկել էր զինադադարի այնպիսի պայմաններ, որոնց անհնար էր ընդունել և կռիւր շարունակեց: Յետագայ դրութիւնը, որ ստեղծւեց ռազմաճակատում, ցոյց տւեց, որ արիւնհեղութիւնն անիմաստ է: Եւ մենք ստիպւած եղանք ընդունել զինադադարի պայմանները և անցնել հաշտութեան բանակցութիւններին: Ամսիս 18-ին իրագործւեցին զինադադարի պայմանները: Վաղն երեկոյեան Ալեքսանդրապոլում հաշտութեան բանակցութիւնները սկսւելու են պաշտօնապէս:

Կառավարութիւնն առանց սպասելու խորհրդարանի նիստին, ընտրել և ուղարկել է հաշտութեան պատւիրակութիւն հետևեալ կազմով. նախագահ՝ Ալ. Պատիսեան, անդամներ՝ Աբր. Գիւլիսանդանեան և Ստ. Ղորղանեան. որպէս խորհրդականներ մեկնել են խորհրդարանի անդամներ՝ Լ. Զարաֆեան և Վ. Մինախորեան և մի շարք մասնագէտներ: Պատւիրակութիւնն Ալեքսանդրապոլ մեկնեց երէկ գիշեր, ուր թշնամու պատւիրակները սպասում են նրանց: Թէ ի՞նչ վախճան կունենայ, դժւար է ասել: